

武英殿聚珍版丛书

天

地

人

物

事

理

氣

神

直齋書錄解題卷七

宋 陳 振 孫 撰

傳記類

古列女傳九卷

案此書篇目與文獻通攷異通攷作古列女傳八卷續列女傳一卷載王同序

畧云以頌攷之每篇皆十五傳耳則凡無頌者疑皆非向本書不特自程嬰母爲斷也故并錄其目而以頌證之刪爲八篇號古列女傳餘十二傳又以時次之別爲一篇號續列女傳此本卷數正與王氏所分同而不別出續列女傳之目蓋書則王本而名則仍其舊耳

漢護都水使者光祿大夫劉向子政撰成帝時趙氏姊弟起微賤踰禮制向以爲王教由內及外故採取

詩書所載賢妃貞婦興國顯家可法則及嬖孽亂亡者序次爲八篇以戒天子其七篇篇十五人爲一百五人第八篇爲頌義隋唐志及崇文總目皆十五卷蓋以七篇分爲上下并頌爲十五卷而自陳嬰母以下十六人附入其中或與向同時或在向後者皆好事者所益也王回曾鞏二序辨訂詳矣鞏之言曰後世自學問之士多徇於外物而不安其守其室家旣不見可法故競於邪侈豈獨無相成之道哉士之苟於自恣顧利冒恥而不知反己者往往以家自累故

也故曰身不行道不行於妻子況於南鄉天下之主
哉愚嘗三復其言而志之向書傳於世鮮矣惟此書
獨全其稱詩芟苒柏舟大車之類與今說詩者乖異
蓋齊魯韓之學固不盡與毛氏同也

東觀漢紀十卷

漢謁者僕射劉珍校書郎劉騊駼等撰初班固在顯
宗朝嘗撰世祖本紀功臣列傳載記二十八篇至永
初中珍騊駼等著作東觀撰集漢紀其後盧植蔡邕
馬日磾等皆嘗補續唐藝文志著錄者一百二十七

卷

案隋志作百四十三卷唐志百二十七卷原本作百二十卷誤今改正

今所存惟吳

漢賈復耿弇寇恂馮異祭遵傅俊景丹蓋延九人列傳而已其卷第凡十而闕第七八二卷未知果當時之遺否也

高士傳十卷

晉徵士安定皇甫謐士安撰序稱自堯至魏咸熙二千四百餘載得九十餘人今自被衣至管寧惟八十七人

黃帝內傳一卷

序云錢鏗遊衡山得之石室劉向校中祕書傳於世
誕妄不經方士輩所託也

飛燕外傳一卷

稱漢河東都尉伶元子于撰自言與揚雄同時而史
無所見或云僞書也然通德擁髻等事文士多用之
而禍水滅火一語司馬公載之通鑑矣

西京雜記六卷

晉句漏令丹陽葛洪稚川撰其卷末言洪家有劉子
駿書百卷先父傳之歆欲撰漢書雜錄漢事未及而

亡試以此記攷校班固所作殆是全取劉書少有異
同耳固所不取不過二萬餘言今鈔出爲二卷以裨
漢書之闕所謂先父者歆之於向也而館閣書目以
爲洪父傳之非是唐藝文志亦只二卷今六卷者後
人分之也按洪博聞深學江左絕倫所著書幾五百
卷本傳具載其目不聞有此書而向歆父子亦不聞
其嘗作史傳於世使班固有所因述亦不應全沒不
著也殆有可疑者豈惟非向歆所傳亦未必洪之作
也

案晁公武讀書志云此書江
左人皆以爲吳均依託爲之

襄陽耆舊傳五卷

晉滎陽太守襄陽習鑿齒彥威撰

談藪二卷

北齊祕書省正字北平陽玠松撰事綜南北時更八代隋開皇中所述也

梁四公記一卷

唐張說撰按館閣書目稱梁載言纂唐志作盧誼注云一作梁載言邯鄲書目云載言得之臨淄田通又云別本題張說或爲盧誼今按此書卷末所云田通

事跡信然而首題張說不可曉也其所記多誕妄而四公名姓尤怪異無稽不足深辨載言上元二年進士也

景龍文館記八卷

案唐書藝文志作十卷

唐脩文館學士武甄平一撰中宗初置學士以後館中雜事及諸學士應制倡和篇什雜文之屬亦頗記中宗君臣宴褻無度以及暴崩其後三卷爲諸學士傳今闕二卷平一以字行

狄梁公家傳三卷

唐海州刺史江都李邕泰和撰

高力士外傳一卷

唐大理司直郭湜撰

案唐書藝文志作郭湜撰大歷中大理司直原本作鄭湜誤今

改正

北征雜記一卷

唐宰相趙憬撰貞元四年咸安公主下降回紇憬副

關播爲冊禮使作此書紀行

唐年小錄八卷

案宋史藝文志作六卷

唐戶部尚書扶風馬總會元撰記唐以來雜事分爲

七門末卷爲雜錄舊有一本畧甚復得程文簡本傳之始爲全書

陵園記一卷

唐宗正丞李

原註失其名

撰光化元年序

鳳池歷二卷

不著名氏記長孫無忌歷官本末及家世子孫按唐志馮宇鳳池錄五十卷李淑書目惟存五卷記宰相名次事跡非此書

鄴侯家傳十卷

唐亳州刺史京兆李繁撰繁宰相泌之子坐事下獄
知且死恐先人功業泯滅從吏求廢紙拙筆爲傳按
中興書目有柳玼後序今無之繁嘗爲隨州韓退之
送諸葛覺詩所謂鄴侯家多書插架三萬軸者也其
曰行年餘五十出守數已六屢爲丞相言雖懇不見
錄則韓公於繁亦拳拳矣新舊史本傳稱繁無行漏
言裴延齡以誤陽城師事梁肅而烝其室殆非人類
然則韓公無乃溢美而所述其父事庸可盡信乎

牛羊日歷一卷

唐劉軻撰牛指僧孺羊謂虞卿漢公也是不孫甚矣
西南備邊錄一卷

唐宰相李德裕文饒撰太和中鎮蜀所作內州縣城
鎮兵食之數大畧具矣

異域歸忠傳二卷

李德裕撰會昌二年盟沒斯內附德裕奉詔采秦漢
以來由絕域歸中國以名節自著功業始終者凡三
十人爲之傳

蠻書十卷

唐安南宣慰使樊綽撰記南詔事咸通五年奏之

閩川名士傳一卷

唐崇文館校書郎黃璞所記人物自薛令之而下凡
五十四人

崔氏日錄一卷

不著名氏殘缺無始末末有跋尾不知何人言此書
出宋敏求家攷訂年月及所載人名姓甚詳蓋廣明
元年崔沆爲相非其子弟卽其門人爲之字畫清麗
而其所記不過蒲飲交通評議有以見唐末風俗之

一頁書金角是
名一
弊云

開元天寶遺事二卷

案文獻通攷作四卷

五代太子少保天水王仁裕德輦撰所記一百五十

九條

入洛記一卷

王仁裕撰仁裕仕前蜀國亡入洛記行

中朝故事二卷

僞唐給事中尉遲偓撰載唐末雜事

燉煌新錄一卷

有序稱天成四年沙州傳舍集而不著名氏蓋當時
奉使者敘張義潮本末及彼土風物甚詳涼武昭王
時有劉昫者著燉煌實錄二十卷故此號新錄

唐末汎聞錄一卷

題常山閻自若撰

案宋史藝文志作高自若

記五代及諸僭偽事

其序自言乾德中得於先人及舅氏聞見且曰傳者
難驗見者易憑攷之史策不若詢之耆舊也然所記
亦時有不同者如李濤納命事本謂張彥澤今乃云
謁周高祖未詳孰是